



partii naleraq

UPA2016/97

Nunatsinni aatsitassarsiornermi uranimik aatsitassallu allanik ulorianartunik qingnornertalinnik saniatigut tamakkiisumilluunniit paaasoqarsinnaalissanersoq avammullu niuerutiginnittoqarsinnaalissanersoq pillugu innuttaasunik taasititsisoqarnissaanik siunnersuut, taasititsinissarlu sioqqullugu inuit ilisimasanik tamakkiinerusunik tunngavisseqqullugit paasititsiniaanerit illuinnaasiunngitsut aallarteqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut Inuit Ataatigiit ilaasortaataata)

Siulianitut erseqqissaqkillarput, Partii Naleraq uranimut naaggaartuuvoq.

Aamma siulianitut taama aallarniuteqarusuppugut uunga Inuit Ataatigiit inatsisartuni ilaasortaataata aalajangiiffigisassatut siunnersuutaannut. Ippassaq siunnersuut alla pisuussutitsinnut tunngasoq maani inersuarmi eqqartorparput, ilaatigullu uagutsinniit oqariartuutugalugu taanna pisuussupput allanik tamanit pingaarnerpaangortillugu suliniutugalugu aallartittariaqalersugut. Pisuussut taanna tassaavoq imeq.

Tungitsinniit nassuerutigissavarput, tamakku oqaluserissallugit uagutsinnut pingaarnerujussuartut isigingatsigit, isumaqatigiissutigaangut, tunisassiarinerani mingutitsinaviangillat, pingaarnertullu pisuussutigaarput naasaanngiusartumik annertussusilik, nunarsuarmioqatitta annertusiartuinnartumik pisariaqartitaat.

Tamannali qitiutippallaarnagu, massakut siunnersuuteqarput inuiaat kalaallit uranimik aatsitassarsiulersinnaanermut taasitinneqassasut, tamannalu isertuanata qularatalu isumaqatigalugu suaarutigissuarput. Inuiaat kiffaanngissuseqarlutik taasitinneqarumarput, ilisimatinneqarlutik suut periarfissaanersut aammalu sooq, ilanngulluglu ilisimatinneqartariaqarput, inuiaat kalaallit pisuussutinik allanik mingutitsinngitsunik periarfissagissaarnernik periarfissaqarlutik. Sukumiisumik paasititsiniaasoqartariaqarpoq, innuttaasut toqqisitinneqartariaqarput isumaallu kikkut tamat oqartussaaqataanerannik sakkoqarluta periarfissillugit.

Soorlu nunani allani aalajangiiffigineqartussaani annertuumik inuiaqatigiinnut sunniuteqartussani aamma naliginnaasumik taamaasiortoqartartoq. Nunatsinni assersuutissaqippoq 2008-mi namminersorneq pillugu taasitinneqaratta aamma EF-miit ilaasortaaginnarnissatsinnik taasitinneqaratta. Tassa kikkut tamat oqartussaaqataanerannik ataqqinnilluni inuiaqatigiinnut aperineq. Aperineq ataqqinninnermik tunngaveqartoq, pingaarutilittullu aamma ilisimasaqarnerulernissamik toqqisititsinissamillu

tungaveqartoq. Tamakkulu uagut tungitsinniit qitiulluinnartuupput taama aamma isumaqarnitsinnut, paaalersinnaanissamut/aatsitassarsiulersinnaanermut isumaqataagaanni isumaqataanngikkaanniluunniit arlaannaanulluunniit attuumassuteqanngitsumik paasititsiniaalluariatluni innuttaasut isumaat ataqqigaanni ernumassutaasariaqanngittoq, pingaarutilerujulli.

Taamaattumik siunnersuut taperserlugu aappassaaneerseqannginnermini, tungaviusumik inatsiseqalernissatsinnik aamma suliaqarnitsinnut sakatsinnginnissaa ilanngullugu ataatsimiitaliami sukumiisumik suliarineqarnissaa innersuussutigaarput.

Qujanaq